

18 SEP 1998
Umno-Mustafa

KEADAAN POLITIK STABIL BUKTI KEMATANGAN UMNO, KATA TOKOH VETERAN

JOHOR BAHRU, 18 Sept (Bernama) -- Seorang tokoh veteran Umno berkata keadaan politik dan keselamatan negara yang stabil dan tidak terjejas ekoran pemecatan Datuk Seri Anwar Ibrahim daripada kabinet dan Umno dua minggu lepas menunjukkan kematangan Umno di bawah pimpinan Datuk Seri Dr Mahathir Mohamed.

Tan Sri Mustafa Abdul Jabar berkata Umno di bawah pimpinan Dr Mahathir mampu menangani segala bentuk masalah dan kerumitan yang dihadapinya.

"Keadaan keselamatan yang terjamin dan keamanan yang dapat dinikmati oleh semua lapisan masyarakat di negara ini adalah hasil daripada kesusahan yang pernah dilalui oleh Umno pada masa lalu," katanya di sini hari ini.

Menurutnya, rakyat tidak perlu bimbang atau sangsi dengan tindakan Dr Mahathir terhadap Anwar, sebaliknya perlu memberi sokongan yang padu kepada pemimpin negara itu.

"Saranan beliau (Dr Mahathir) supaya anggota Umno mengadakan solat hajat adalah sebagai seruan ikhlas agar rakyat dapat melihat kebenaran daripada isu itu," katanya.

Mustafa yang juga Pengerusi Lembaga Pertubuhan Peladang (LPP) turut menyuarakan sokongan lebih setengah juta anggota pertubuhan itu di seluruh negara kepada Dr Mahathir berkaitan tindakan memecat timbalannya itu.

"LPP membuat keputusan itu dalam mesyuarat Lembaga Pengarah kali ke-138 di sini hari ini atas dasar kesucian Islam, kemuliaan bangsa Melayu dan kedaulatan bangsa," katanya.

Katanya, dengan sokongan padu dan doa daripada para peladang Dr Mahathir diharap akan terus terpelihara daripada sebarang musibah.

Mustafa juga meminta kerajaan mengharamkan buku "The Singapore Story: Memoirs of Lee Kuan Yew" di negara ini kerana ia boleh membangkitkan perasaan persengketaan di kalangan rakyat tempatan.

Menurutnya, melalui buku itu Lee cuba mengungkit perkara lama dengan menggunakan bentuk baru supaya rakyat Singapura dapat mengimbuai sejarah hubungan "pahit" republik itu dengan Malaysia.

-- BERNAMA

RAM NMO